

## **Diari Ramadan untuk warga UMP**

Kuantan, 16 Jun- Pusat Islam dan Pembangunan Insan (PIMPIN) memperkenalkan beberapa inisiatif menyemarakkan kedatangan bulan Ramadan al-Mubarak yang bakal menjelang esok dengan mengedarkan buku Diari Ramadan dan poster waktu berbuka puasa kepada semua staf UMP.

Menurut Pengarah PIMPIN, Dr. Mahyuddin Ismail, pemberian Diari Ramadan kepada staf universiti adalah sebagai menambah ilmu dan keberkatan menjelang tibanya bulan Ramadan.



"Selain iftar dan bertadarus mereka boleh menambahkan keberkatan berpuasa dengan memperbanyakkan amalan dengan bermuhasabah. Dalam Buku Diari Ramadan ini, terdapat dua bahagian iaitu yang pertama menceritakan mengenai keagungan ramadan, ulangkaji bab puasa yang merangkumi niat berbuka puasa, solat terawih, azam ramadan dan ciri-ciri orang yang bertakwa.

Manakala bagi bahagian kedua memuatkan mengenai Tazkirah dan Muhasabah, pada bahagian ini terdapat 30 tazkirah yang dimuatkan antaranya hidayah Menuju Jalan Allah, sedekah, memelihara pancaindera, tipu daya syaitan dan bermacam-macam lagi," katanya. Selain itu, diari ini turut menyediakan senarai semak waktu untuk bersolat dan mengerjakan amalan sunat untuk diri sendiri.

Naib Canselor UMP, Profesor Dato' Dr. Daing Nasir Ibrahim berbangga dengan inisiatif yang diperkenalkan ini dan mengharapkan diari ini akan menjadi panduan kepada warga UMP untuk sentiasa bersungguh-sungguh dalam menjalankan kewajipan ibadah puasa dan mengharapkan ibadah puasa diterima Allah. Universiti juga mempelawa staf UMP dan orang ramai yang berhasrat bersedekah dengan menaja Iftar Jamaie secara jemaah dalam menjayakan program Berbuka Puasa, Moreh atau Sahur yang diadakan setiap hari menjelangnya bulan Ramadhan.



Sementara itu, Pembantu Tadbir, Unit Perundungan UMP, Nurul Syakinah Abdullah, 24 berkata, beliau amat berterima kasih kepada universiti atas pemberian Diari ini, dapatlah dijadikan panduan dan rujukan sepanjang sebulan di bulan Ramadan kali ini. Manakala rakannya dari Jabatan Pendaftar, Ami Nurul Faiz Haji Ami Rudin turut memuji usaha universiti yang amat murni sekali melalui penyebaran maklumat menerusi Diari Ramadan ini. Katanya secara tidak langsung ia dapat mengingatkan kita yang terlalu sibuk dengan kerja seharian.

Selain Diari Ramadan ini, PIMPIN turut menganjurkan Festival Ramadan disepanjang bulan Ramadan ini. Pelbagai program akan dijalankan antaranya Tarawih, Tadarus Al-Quran, Jejak Asnaf Fakir Miskin, Bubur Lambuk Komuniti, Diskusi Rahsia Keajaiban Al-Quran, Iftar bersama penduduk kampung dan lain-lain lagi.

*Disediakan Bahagian Komunikasi Korporat.*

Posted By : NOR FADZILLAH BINTI ZULKIPLI Date Posted : 17-06-2015, 12:58:29